



Lowri Evans  
Cyfarwyddwr Cyffredinol  
Y Comisiwn Ewropeaidd  
Cyfarwyddiaeth Gyffredinol Materion Morol a Physgodfeydd  
B-1049 Brwsel

5 Mawrth 2012

Annwyl Lowri

### **Ymchwiliad y Grŵp Gorchwyl a Gorffen ar y Polisi Pysgodfeydd Cyffredin i'r diwygiadau arfaethedig i'r Polisi Pysgodfeydd Cyffredin**

Ymhellach i'r sesiwn dystiolaeth ardderchog a gafwyd gyda chi ym mis Ionawr, ysgrifennaf atoch i dynnu'ch sylw at rai o'n canfyddiadau cychwynnol a ddaeth i'r amlwg yn ystod cam cyntaf ein hymchwiliad i ddyfodol y Polisi Pysgodfeydd Cyffredin.

Wrth ddod i'r casgliadau a wnaed, defnyddiwyd tystiolaeth gan gynrychiolwyr diwydiannau yn y sectorau pysgodfeydd a dyframaeth, cyrff y llywodraeth, cyrff amgylcheddol a chithau. Mae rhagor o wybodaeth i'w chael ar dudalennau'r Grŵp Gorchwyl a Gorffen ar y Polisi Pysgodfeydd Cyffredin ar y we.

O gofio cyflwr presennol sector pysgodfeydd yr Undeb Ewropeaidd a'r dirywiad parhaus yn stociau pysgod Ewrop, mae'r Grŵp yn credu bod cynigion y Comisiwn yn amserol ac y dylid eu croesawu, yn gyffredinol. Gan hynny, hoffem eich llongyfarch chi a Chomisiynydd Damanaki am y pecyn diwygio uchelgeisiol hwn a'r cynigion dilynol ar gyfer Cronfa Môr a Physgodfeydd Ewrop a gyflwynwyd ddiwedd mis Tachwedd.

Mae'r Grŵp yn cefnogi nod y Comisiwn Ewropeaidd o sicrhau bod sector pysgodfeydd Ewrop yn fwy cynaliadwy a phroffidiol yn y dyfodol. Yn ystod yr ymchwiliad, fodd bynnag, galwodd rhanddeiliaid o bob sector ar y Comisiwn Ewropeaidd i roi gwell eglurhad o nifer o elfennau o'r cynigion deddfwriaethol a byddwn yn annog ein Dirprwy Weinidog, Alun Davies, i bwysu am hyn yn ei drafodaethau fel rhan o ddirprwyaeth y Deyrnas Unedig.

Bae Caerdydd  
Caerdydd  
CF99 1NA

Cardiff Bay  
Cardiff  
CF99 1NA

Nodwyd chwe maes blaenoriaeth yn benodol yn ystod cam cyntaf y gwaith, a chredwn y byddai angen newid testun y rheoliadau drafft i gyd-fynd â'r rhain:

- Sicrhau bod y Polisi Pysgodfeydd Cyffredin a Chyfarwyddebau amgylcheddol yr UE yn gyson, wedi'u cyfuno ac yn cydweddu â'i gilydd;
- Sicrhau bod blaenoriaeth yn cael ei roi i ddatblygu cynlluniau amflwydd a'u bod yn cyfeirio at stociau ar y glannau ac ecosystemau;
- Sicrhau bod pysgodfeydd yn cael eu rheoli'n rhanbarthol yn hytrach nag yn ganolog, a bod pysgotwyr a chynhyrchwyr sy'n gweithredu ar raddfa fach yn cael cyfle digonol i leisio'u barn yn y cynghorau cynghori;
- Sicrhau nad yw'r cynigion mandadol i drosglwyddo consesiynau pysgota yn caniatáu i'r rhai sydd â'r pŵer economaidd mwyaf fanteisio ar gyfleoedd pysgota ar draul cymunedau ar yr arfordir;
- Sicrhau nad yw'r cynigion ynghylch pysgod a gaiff eu taflu'n ôl yn rhwystro'r gweithgaredd cynaliadwy presennol o daflu pysgod byw yn ôl i'r môr;
- Sicrhau bod mesurau cadarn ar waith i sicrhau bod yr holl Aelod-wladwriaethau yn casglu data mewn modd systematig a chyson.

Yn ogystal â'n meysydd blaenoriaeth, mae gennym sylwadau ar hawliau pysgota hanesyddol, dyframaeth a Chronfa'r Môr a Physgodfeydd Ewrop.

Mae'r papur sydd ynghlwm sy'n ymdrin â'n canfyddiadau allweddol yn manylu ar y materion a'r meysydd allweddol i'w gwella, a nodir uchod.

Byddwn yn parhau i fonitro hynt y cynigion yn ystod y trafodaethau, gan gynnwys y trafodaethau tyngedfennol yn Senedd Ewrop.

Rydym wedi ysgrifennu at y rapporteurs perthnasol ac at Aelodau Cymru o Senedd Ewrop, a gobeithiwn y bydd modd trafod y materion hyn (ac unrhyw bwyntiau eraill sy'n codi yn y cyfamser) gyda chi pan fyddwn yn aildrefnu ein hymweliad â Brwsel (sy'n debygol o fod yn mis Mai neu Fehefin).

Yn gywir



**Julie James**  
**Cadeirydd**

# Canfyddiadau allweddol Grŵp Gorchwyl a Gorffen Cynulliad Cenedlaethol Cymru ar y Polisi Pysgodfeydd Cyffredin

## Cyfarwyddeb Fframwaith y Strategaeth Forol (*Erthygl 2.4*<sup>1</sup>)

Mae gan y Polisi Pysgodfeydd Cyffredin (PPC) ran hanfodol yn y gwaith o sicrhau bod Cyfarwyddeb Fframwaith y Strategaeth Forol yn cael ei rhoi ar waith. Gan hynny, rydym yn croesawu cynnig y Comisiwn Ewropeaidd y dylai'r PPC hybu dulliau o reoli pysgodfeydd sy'n seiliedig ar ecosystemau ac y dylai sicrhau'r cynnyrch cynaliadwy mwyaf erbyn 2015. Roedd llawer o'r dystiolaeth a gawsom, fodd bynnag, yn mynegi pryder ynghylch y ffaith nad oes cysylltiad amlwg rhwng y Gyfarwyddeb a'r cynigion i ddiwygio'r PPC. Mae tri phrif faes yn peri pryder:

- Nid yw'r PPC yn atgyfnerthu'n benodol y gofyniad i sicrhau bod gan foroedd statws ecolegol da erbyn 2020.
- Yn y Gyfarwyddeb, nodir bod angen i'r aelod-wladwriaethau gydweithredu'n rhanbarthol ond nid yw'r gofyniad hwn wedi'i gynnwys yn rheoliadau'r PPC.
- Yn y Gyfarwyddeb, mae targedau ar gyfer pysgod a gaiff eu taflu'n ôl, ond nid ydynt yn cyd-fynd â'r targedau yn y cynigion i ddiwygio'r PPC.

Mae'r rhanddeiliaid yn credu bod y diffyg eglurder hwn yn creu anghysonderau a gwrthdaro posibl rhwng y Gyfarwyddeb a'r PPC, a allai danseilio amcanion cynigion y Comisiwn Ewropeaidd.

**Rydym yn argymhell y dylid newid *Erthygl 2.4* i ddarllen fel a ganlyn:**

**The Common Fisheries Policy shall integrate Union environmental legislation requirements; *contribute to the achievement of good environmental status of EU waters by 2020 and favourable conservation status under the Habitats and Birds Directives.***

## Cyfarwyddebau Cynefinoedd ac Adar (*Erthygl 12*)

Roedd nifer o gyrff amgylcheddol yn pryderu am eiriad y cynigion i ddiwygio'r PPC yng nghyswllt y Cyfarwyddebau Cynefinoedd ac Adar. Roedd rhanddeiliaid yn credu'n gryf bod y cynigion presennol yn gwanhau'r warchodaeth y mae'r Cyfarwyddebau presennol yn ei chynnig i gynefinoedd a rhywogaethau morol. Efallai mai camgymeriad wrth ddrafftio testun y cynigion yw hyn, ond gall amharu'n arw ar y gallu i roi'r Cyfarwyddebau hyn ar waith yn effeithiol.

**Gan hynny, rydym yn galw am welliannau i destun y cynigion, fel a ganlyn:**

---

<sup>1</sup> Sylwch fod yr holl welliannau a gynigir yn y llythyr hwn yn ymwneud â'r Rheoliad drafft ar gyfer y Polisi Pysgodfeydd Cyffredin COM(2011)425, a gyhoeddwyd ar 13 Gorffennaf 2011

**Erthygl 12.1 i'w newid i ddarllen fel a ganlyn:**

...Member States in such a way as to *avoid deterioration of habitats and disturbance of species* in such special areas of conservation.

**Erthygl 12.2 i'w newid i ddarllen fel a ganlyn:**

The Commission shall be *obliged* to adopt delegate acts...to specify fishing related measures to *avoid deterioration of habitats and disturbance of species* in such special areas of conservation.

### **Cynlluniau amflwyddyn a'r cynnyrch cynaliadwy mwyaf (Erthygl 2)**

Roedd cyrff amgylcheddol a chyrrff y diwydiant pysgota yn gefnogol i'r cynnig i ddatblygu cynlluniau amflwyddyn i reoli stociau pysgod. Byddai dulliau o reoli stociau sy'n seiliedig ar gynlluniau ar gyfer nifer o flynyddoedd, ac sy'n diogelu ecosystemau, yn sicrhau gwell canlyniadau i'r stociau pysgod a'r diwydiant.

Roeddent yn cytuno, fodd bynnag, fod angen llawer rhagor o fanylion ynglŷn â rheoli sut a phryd y caiff y cynlluniau eu datblygu. Yn ogystal â hyn, gan mai drwy gyfrwng y cynlluniau hyn yn bennaf y bydd modd sicrhau pysgodfeydd cynaliadwy, dylid sefydlu proses glir i gynnwys rhanddeiliaid yn y gwaith o'u datblygu.

Roedd llawer o'r dystiolaeth o blaid cynnal asesiad amgylcheddol o gynlluniau amflwyddyn ac y dylent ystyried pysgodfeydd y glannau, lle bo hynny'n berthnasol, er mwyn gweithredu ar sail ecosystemau cyfan.

Rydym yn cydnabod bod bylchau mewn data a gwybodaeth wyddonol a all, yn y tymor byr, fod yn rhwystr i'r gwaith o ddatblygu cynlluniau amflwydd ond, er hyn, gan eu bod mor bwysig i lwyddiant y polisi, credwn fod yn rhaid ymrwymo i'w datblygu fel mater o frys.

Gan hynny, rydym yn argymhell, lle bo hynny'n bosibl, y dylid mabwysiadu cynlluniau amflwyddyn erbyn 2015 i sicrhau eu bod yn cyd-fynd â'r ymrwymiad i sicrhau'r cynnyrch cynaliadwy mwyaf o ran stociau pysgod erbyn 2015:

***Ychwanegu adran 5 newydd at Erthygl 2 sy'n nodi: Multiannual plans shall, where possible, be adopted by 2015.***

### **Trosglwyddo Consesiynau Pysgota (Erthyglau 27-33)**

Mae'r rhan fwyaf o fflyd pysgota Cymru yn cynnwys cychod bach y glannau sy'n llai na 12 metr o hyd. Gan hynny, roedd y rhanddeiliaid yn pryderu am gynigion y Comisiwn i gyflwyno cynllun mandadol o gonsesiynau pysgota trosglwyddadwy i bob cwch dros 12 metr o hyd a phob cwch a ddefnyddir i dynnu offer. Mynegwyd y pryderon penodol a ganlyn:

- Byddai cyflwyno consesiynau pysgota trosglwyddadwy yn arwain at breifateiddio adnodd cyhoeddus a byddai'r consesiynau pysgota, yn y pen draw, yn debygol o fynd i ddwylo'r rhai sydd â'r pŵer economaidd mwyaf.
- Ni fyddai'r system consesiynau pysgota trosglwyddadwy, o reidrwydd, yn sicrhau pensiwn i bysgotwyr i ganiatáu iddynt ymddeol a lleihau gorgapasiti. Er y byddai perchennog y consesiynau pysgota yn gallu eu rhentu ar brydles er mwyn cael pensiwn, dim ond perchennog neu gapten y cwch fyddai'n cael yr arian, nid y criw.
- Byddai'r system consesiynau pysgota trosglwyddadwy'n arwain at sefyllfa lle byddai pysgotwyr go iawn yn gorfod talu symiau mawr am gwota i berchnogion cychod a chonsesiynau pysgota.
- Gan fod nifer o gychod yn rhai amlbwrpas ac yn defnyddio offer i dynnu ac offer goddefol, nid yw'n glir sut a phryd y byddai'r system fandadol yn gymwys i'r cychod hyn.
- Byddai'r system fandadol yn creu problemau penodol i'r fflyd sy'n pysgota ar raddfa fechan ar hyd y glannau yng Nghymru oherwydd, yn hanesyddol, prin fu rhywogaethau'r cwotâu a oedd ar gael iddynt.

Yn gyffredinol, teimlai'r rhanddeiliaid na ddylid cyflwyno system fandadol o gonsesiynau ac y dylid cyflwyno system wirfoddol yn cynnwys gwahanol ddulliau i'r aelod-wladwriaethau eu defnyddio i leihau gorgapasiti ac i newid ymddygiad pysgotwyr. Er ein bod yn cydnabod cynnig y Comisiwn i ganiatáu i aelod-wladwriaethau gynllunio'u systemau a'u dulliau gwarchod eu hunain, rydym yn teimlo bod y mater hwn yn rhy bwysig i'w adael i ffawd.

**Rydym yn argymhell, gan hynny, y dylai'r system consesiynau pysgota trosglwyddadwy fod yn wirfoddol. Dylid o leiaf sicrhau mwy o eglurder yn y ddeddfwriaeth o ran y modd y caiff ei chymhwyso i gychod bach ag offer cymysg ac o ran y camau y dylid eu cymryd i ddiogelu ac i gynnal fflyd pysgota amrywiol Ewrop.**

### **Datganoli cyfrifoldeb i'r rhanbarthau**

Rydym yn croesawu cynigion y Comisiwn i ddatganoli cyfrifoldeb dros reoli pysgodfeydd i'r rhanbarthau. Heb ddatganoli, a chynyddu rôl rhanddeiliaid, mae'n anodd dychmygu sut y gellir rheoli pysgodfeydd yr UE yn gynaliadwy. Fodd bynnag, roedd y rhanddeiliaid yn teimlo'n gryf nad oes digon o eglurder o ran y modd y gallai datganoli'r gwaith o reoli pysgodfeydd weithio'n ymarferol, er enghraifft a fydd gan y cynghorau cynghori ran yn y gwaith, a fydd disgwyl iddynt reoli pysgodfeydd ar y cyd ag aelod-wladwriaethau neu a fydd aelod-wladwriaethau'n cael eu gorfodi i weithio gyda'i gilydd i sicrhau bod pysgodfeydd yn cael eu rheoli'n rhanbarthol?

Rydym yn croesawu'r ffaith bod Cyfarwyddwr Cyffredinol Materion Morol a Physgodfeydd yn cydnabod bod angen mwy o eglurder yn y maes hwn. Roedd y Pwyllgor hefyd yn croesawu'r ffaith bod y Cyfarwyddwr Cyffredinol yn cadarnhau y gallai'r aelod-wladwriaethau, o dan y cynigion, ddod ynghyd i reoli moroedd ar raddfa ranbarthol lai er enghraifft Môr Iwerddon. Byddwn, felly, yn annog Llywodraeth Cymru i fwrw ymlaen â'r mater hwn ac i hyrwyddo'r syniad a'i ddatblygu fel ffordd o reoli pysgodfeydd.

Clywodd y Grŵp fod cefnogaeth gyffredinol i rôl a swyddogaethau'r Cynghorau Cynghori a theimlai'r rhanddeiliaid yn gryf y dylai'r Cynghorau Cynghori fod yn rhan o'r gwaith o ddatblygu ac asesu cynlluniau amlflwyddyn. Fodd bynnag, roedd rhai'n pryderu am y modd y bu Cynghorau Cynghori yn gweithredu. Teimlai'r rhanddeiliaid:

- Bod y Cynghorau Cynghori Rhanbarthol wedi ymbellhau oddi wrth bysgotwyr sy'n gweithredu ar raddfa fach ac, oherwydd hynny, nid yw eu sylwadau wedi cael eu cynrychioli'n ddigonol yn y gorffennol.
- Bod y rhai sy'n cynrychioli buddiannau pysgotwyr sy'n gweithredu ar raddfa fach yn gwneud hynny'n wirfoddol ac yn gorfod dewis rhwng bod ar eu cychod neu fynd i gyfarfodydd i gynrychioli'r diwydiant.

**Rydym yn argymhell, gan hynny, y dylid sicrhau bod strwythur y cynghorau cynghori yn y dyfodol yn rhoi llais i bysgotwyr a chymunedau'r glannau.**

Rydym yn croesawu'r cynigion yng nghyswllt Cronfa'r Môr a Physgodfeydd Ewrop a fyddai'n caniatáu i'r aelod-wladwriaethau gynorthwyo cynrychiolwyr y sector pysgota sy'n gweithredu ar raddfa fach i gyfrannu at drafodaethau'r Cyngor Cynghori Rhanbarthol.

### **Pysgod a gaiff eu taflu'n ôl**

Er bod y cyrff amgylcheddol a'r diwydiant pysgota o blaid yr egwyddor o ddod â'r arfer o daflu pysgod yn ôl i'r môr i ben, roedd rhai ohonynt yn pryderu am ganlyniadau anfwriadol gwahardd yr arfer yn gyfan gwbl. Yn benodol, mae'r Pwyllgor yn teimlo'i bod yn bwysig:

- Sicrhau bod cyn lleied o bysgod diangen â phosibl yn cael eu dal yn y lle cyntaf drwy ganolbwyntio ar ddefnyddio offer pwrpasol a chryfhau'r cysylltiad rhwng *Erthygl 14* sy'n ymwneud â mesurau technegol ac *Erthygl 15* sy'n ymwneud â physgod a gaiff eu taflu'n ôl.
- Cymryd camau i sicrhau nad yw marchnadoedd newydd yn cael eu creu ar gyfer rhywogaethau o bysgod bach sydd mewn perygl o ddiflannu.

Gan hynny, rydym yn argymhell y dylid newid *Erthygl 15* fel a ganlyn:

**All catches of the following fish stocks subject to catch limits caught during fishing activities in Union waters or by Union fishing vessels outside Union waters shall be brought and retained on board fishing**

vessels and recorded and landed except where used as live bait *or where unwanted catch can be returned alive.*

### **Casglu data (*Erthygl 37 a Chronfa'r Môr a Physgodfeydd Ewrop*)**

Roedd yr holl dystiolaeth yn cytuno bod yn rhaid seilio'r gwaith o ddiwygio'r PPC ar dystiolaeth wyddonol gadarn. Mae'n bwysig bod y broses o gasglu data o dan Bolisi Pysgodfeydd Cyffredin newydd yn cael ei chynllunio i hybu dulliau sy'n diogelu ecosystemau yn hytrach na dim ond diogelu un stoc pysgod unigol. Bydd casglu amrywiaeth ehangach o ddata o safon yn bwysig ar gyfer datblygu a gweithredu cynlluniau amlflwyddyn ac yn hanfodol ar gyfer datblygu pysgodfeydd Ewropeaidd cynaliadwy. Roeddem yn falch bod y Cyfarwyddwr Cyffredinol wedi cydnabod hyn yn ystod ei thrafodaethau â ni ac rydym yn croesawu cynigion y Comisiwn Ewropeaidd i weithio gyda'r gymuned wyddonol a'r aelod-wladwriaethau i wella'r dystiolaeth sydd ar gael.

Er mwyn llenwi'r blychau presennol yn y data, roeddem yn teimlo bod angen gwneud rhagor i gymell pysgotwyr i gymryd rhan yn y broses o gasglu data ac i ddatblygu'r bartneriaeth rhwng y gwyddonwyr a'r pysgotwyr. Mae angen sicrhau bod y data a gesglir yn cael ei fwydo'n ôl i'r diwydiant mewn ffordd ddefnyddiol er mwyn iddynt weld ei bod yn fuddiol iddynt gymryd rhan yn y broses. Gan hynny, rydym yn croesawu'n frwd y cynnig yn Rheoliadau Cronfa'r Môr a Physgodfeydd Ewrop i sicrhau bod arian ar gael ar gyfer cynlluniau o'r math hwn.

Fodd bynnag, er mwyn sicrhau bod yr aelod-wladwriaethau'n rhoi sylw dyledus i'r broses o gasglu data, rydym yn cynnig y dylid cryfhau rheoliadau'r PPC i'w gwneud yn ofynnol i'r aelod-wladwriaethau ddatblygu cynlluniau casglu data gyda rhanddeiliaid.

Ar hyn o bryd, mae *Erthygl 37.3: Gofynion Data ar gyfer Rheoli Pysgodfeydd* yn ei gwneud yn ofynnol i'r aelod-wladwriaethau sicrhau bod y gwaith o gasglu a rheoli data gwyddonol ar gyfer rheoli pysgodfeydd yn cael ei gydgysylltu'n genedlaethol. Rydym yn argymhell bod y cynigion yn cael eu diwygio fel a ganlyn:

#### ***Erthygl 37.3***

**Member States shall ensure the national coordination of the collection and management of scientific data for fisheries management and *shall produce multi-annual plans for data collection.* To this end they shall designate a national correspondent and organize an annual national coordination meeting. The Commission shall be informed of the national coordination activities *and of the production multi-annual plans* and be invited to the coordination of meetings.**

## **Dyframaeth**

Roedd cefnogaeth gyffredinol i gynnig y Comisiwn Ewropeaidd i'w gwneud yn ofynnol i'r aelod-wladwriaethau ddatblygu strategaethau dyframaeth cenedlaethol. Er y dylid rhoi hyblygrwydd i'r aelod-wladwriaethau gynllunio strategaethau cenedlaethol sy'n addas ar gyfer eu diwydiannau nhw, mae'n bwysig bod gan yr UE gyfeiriad canolog cryf. Rydym yn nodi pryderon Llywodraeth y Deyrnas Unedig a Llywodraeth Cymru ynghylch sybsidiaredd ond yn cydnabod bod y diwydiant yn awyddus i sicrhau twf yn y sector drwy gael arweiniad canolog ar gyfer yr UE cyfan. Fodd bynnag, bydd yn bwysig sicrhau bod y PPC yn ei gwneud yn ofynnol i'r diwydiant lynu wrth fesurau a chyfarwyddebau i ddiogelu'r amgylchedd.

## **Cynigion ar gyfer Cronfa'r Môr a Physgodfeydd Ewrop**

Ar ôl inni ddechrau casglu ein tystiolaeth am y cynigion i ddiwygio'r PPC, cyn cyhoeddi'r cynigion ynghylch Cronfa'r Môr a Physgodfeydd Ewrop, roeddem yn falch o weld bod cynifer o ddymuniadau'r rhanddeiliaid wedi'u cynnwys. Yn benodol, rydym yn croesawu'r cynigion i ganiatáu i'r aelod-wladwriaethau gynnig arian ar gyfer:

- Cymorth ar lefel uwch i fflyd y glannau sy'n pysgota ar raddfa fach;
- Cymorth busnes a marchnata i fflyd y glannau sy'n pysgota ar raddfa fach;
- Dechrau busnesau newydd ar hyd y glannau;
- Cyrff i gynrychioli fflyd y glannau sy'n pysgota ar raddfa fechan i roi llais iddynt mewn trafodaethau'n ymwneud â'r PPC.

Gobeithio y bydd yr elfennau hyn yn parhau'n rhan o'r gronfa a byddwn yn sicr yn annog ein Llywodraeth i ddefnyddio'r arian i gynnig cymorth cyffredinol i gymunedau sy'n pysgota ar hyd y glannau yng Nghymru.

## **Hawliau Pysgota Hanesyddol**

Er ein bod yn deall nad yw hawliau pysgota hanesyddol yn rhan o'r cynigion i ddiwygio'r PPC ar hyn o bryd, gan fod y cychod sydd â'r hawliau hyn yn cael effaith mor niweidiol ar ein fflyd pysgota, mae'n rhaid inni fanteisio ar bob cyfle i dynnu sylw at y problemau difrifol y mae'r mater hwn yn dal i'w creu. Clywsom fod y diwydiant pysgota yng Nghymru yn pryderu'n arw am y canlynol:

- Er mai ychydig iawn o gwotâu ar gyfer stociau masnachol sydd ar gael i bysgotwyr Cymru, mae'r stoc pysgota yn nyfroedd Cymru wedi parhau i ddirywio.



- Nid yw treillongau sy'n perthyn i fflydoedd sydd â hawliau hanesyddol yn cynnig unrhyw fudd economaidd uniongyrchol i gymunedau ar hyd glannau Cymru, ac mae unrhyw bysgod y byddant yn eu dal yn cael eu cofrestru i'w haelod-wladwriaethau eu hunain, felly nid ydynt yn cael eu hychwanegu at y cofnod hanesyddol o'r pysgod a gaiff eu dal yng Nghymru.

Er ein bod yn nodi barn y Comisiwn nad yw'r aelod-wladwriaethau, gan gynnwys y Deyrnas Unedig, yn awyddus i ymdrin â'r mater hwn ar hyn o bryd drwy'r PPC, rydym yn gobeithio'n arw y bydd yr holl aelod-wladwriaethau yn manteisio ar y cyfle i ymdrin â'r mater drwy gyfrwng cytundebau rhanbarthol i ddatganoli'r cyfrifoldeb o reoli pysgodfeydd i'r rhanbarthau. Oni bai y cymerir camau pendant yn y cyswllt hwn, bydd dyfodol cymunedau traddodiadol sy'n pysgota ar raddfa fechan ar hyd y glannau o dan fygythiad.